

Plenchi

Bèl a bati

Awor si kos ta kayente na skolnan. Hébénnan a kuminsá ku nan èksamen final na skolnan avansá. Hóbennan di grupo 8 a kuminsá ku nan “EFO toets”.

Mayornan ku yu den klasnan di èskamen ta sinti manera ta nan mes ta bai pasa èksamen. Kòrda keda trankil i no hasi e yu nervioso. Nos ta pone e skema di èksamen pa e simanan ku nos ta bai drenta. Èksito na tur hóben, nan dosentenan i nan mayornan. Bo a traha duru henter aña? Awel bai ku konfiansa, hala rosea i bisa den bo mes “mi por”. Hasi orashon na Spiritu Santu pa e kompañabu i lusa bo mente. Kada bes ku bo bira poko nervioso hasi e orashon ku nos ta dunabu awe.

Laga nos pasa awor pa dia di mama.

Nos ta bai selebrá dia di mama mañan. Dios bendishoná tur mama pa nan amor inkondishonal pa nan yunan, anto tur nan yunan sin dolor tambe.

Pasa un dia kontentu huntu ku famia of konosinan. Si bo ta un dama sin yu, of nan no ta presente. Selebrá bo bida. Bo tambe merese un dia kontentu. No warda pa niun hende hasi nada pa bo. Plania bo dia delantá. Bo por bai bishitá esnan bandoná na kas di ansiano. Bo por bai un sine of simplemente malkria bo mes ku un bunita sena of desayuno. Tin hopi hende ku ta nan so, un mas ku otro. Laga nos kòrda riba nan tambe den tur nos fiesta i regalo. Mientras esun di ambundansia e otro tin skarsedat. Laga nos purba balansá kosnan den bida. Pero perkurá pa bo felisidat no ta depende di loke otro plania pa hasi ku bo. Bo ta felis ku tur loke bo tin i bo ta selebrá i gradisí tur dia pa esaki.

Danki na tur esnan ku ta komparti i ta duna otronan un man di amor i kariño. Especialmente esnan ku bo no ni konosé. Pero kisas bo ta mire tur siman na kaha ora bo paga bo komestibelnan? Bo ta mira e persona ta bende briyechi i bo tin kariño pe. Bo ta mira e persona den bo hanchi kas i bo ke mustre apresio. Hopi biaha no ta e kos ta hasi hende kontentu, pero ta e atenshon mustrá na nan.

Ban balorá esnan rondó di nos.

Den agènda

Liber di skol

Dianan 14 i 15 di mei asension.

Orashon

Spiritu Santu kompañami durante di dia aki.

Dunami BO pas i sabiduria.

Alehá tur malu for di mi kaminda.

Rondoná mi ku angelnan pa protehami.

Na momentu ku mi ta swak, fortifikami

Na momentu di tentashon yenami ku sano huisio.

Na momentu di duda, kargami.

Danki pa ta semper huntú ku mi.

Un preñchi

Nos ta kontentu i orguyoso di nos St. Margaretha School i st. Franciscus College. Nan a logra e promé premionan den e kompetensha di Lesa pa otro skucha. St. Margaretha College a bai ku e premio pa lesa na papiamentu i st. Franciscus College a bai ku e premio maksimo pa lesa na hulandes. Pabien na nos streanan i tambe na nan mayornan i henter i team di skol. Pero speshalmente nan maestra aktual. Shaydee Cras i Adryñanda Prudencia masha pabien ku boso tremendo prestashon.



Famia kontentu di st. Franciscus College ku nan kampion



**Andryñanda Prudencia di
st. Franciscus College, ganadó
di lesa pa otro skucha na hulandes.**



**Shaydee Cras di st. Margaretha
College ta ganadó absoluto den
kompetensha lesa pa otro skucha
na Papiamentu.**

Mi ta konta

Mama ku yu

Gior ta sinta ta kome na mesa merdia. E ta bira pidi su mama djus.

Gior: “mama mi ke djus”

Mama: “Papia nechi, mama mi por a hana un tiki djus”

Gior: “mama mi ke djus”

Mama: Si bo no pidi bunita bo no ta haña. Bisa, mama mi por haña un tiki djus?”

Gior ta yora inkonsolabel. Mas i mama rabia paso e no por komprende e terkedat.

Mama: “Dikon bo no por bisa manera mama ta siñabu?”

Gior: “mama mi no ke un tiki djus mi ke hooopi djus.”

Mesora e mama a brasa su yu i sunchi baña su kara ku sunchi. El a priminti su mes di no husga prome ku e kompronde promé kiko e otro ke men.

Mucha djispou

Minerva ta pidi su yu, Jeroen, pa bai wak pé si e karnisero tin pata di galiña.

Ora Jeroen yega kas su mama ta puntré: “Anto e tin pata di galiña?”

“Mi no por a wak bon mama paso e tabatin karson largu i sapatu na su pia.”

Riba roster

Eksamen di skolnan 2015-2016

Fecha	Materia pa kada tipo di enseñansa			
	Skol di Fundeshi	VSBO	HAVO	VWO
6 mei	Papiamentu	-	-	-
7 mei	Papiamentu	-	-	-
8 mei	Aritmética i Hulandes	-	Papiamentu	Papiamentu
11 mei	Aritmética i Hulandes	Natuur/Scheikunde2 (TKL)	Ekonomia	Hulandes
12 mei	Aritmética i Hulandes	Papiamentu (PBL, PKL i TKL)	Hulandes	M & O
13 mei	Aritmética i Hulandes	Hulandes (PBL, PKL i TKL)	Biologia	Wiskunde A, B, C
18 mei	-	Ingles (PBL, PKL i TKL)	Frans	Natuurkunde
19 mei	-	Wiskunde (PBL, PKL i TKL)	Ingles	Ekonomia
20 mei	-	Spaño (PBL, PKL i TKL)	Wiskunde A, B	Biologie
21 mei	-	Natuur/Scheikunde2 (PBL, PKL i TKL)	Scheikunde	Ingles
22 mei	-	Ekonomia (PBL, PKL i TKL)	M & O	Geografia
25 mei	-	-	Historia	Historia
26 mei	-	Biologia (PBL, PKL i TKL)	Geografia	Franses
27 mei	-	Tur Sektor (PBL, PKL i TKL)	Natuurkunde	Scheikunde
28 mei	-	Mens & Maatsch. (PBL, PKL i TKL)	Spaño i Informatika	Spaño i Informatika

**Kada hoben mester sigui e roster oficial di eksamen ku skol a duna nan.
Esaki ta pa informá pueblo en general.**